



Kattusseqatigiit Partiiat

05 marts 2010

UPA 2010/73

Inatsisartut suleriaasiata § 35-ia naapertorlugu matumuuna nassiuppara apeqquteqaat aallaavigalugu oqallinnissamut siunnersuut:

Apeqquteqaat aallaavigalugu oqallisissiaq: Sulinermi akileraarutitigut saniatigut isertitat akileraarutitaasa apparsaavingisinnaanerannut inatsisartut qanoq isumaqarpat?

(Inatsisartunut ilaasortaq Jakob Skade, Kattusseqatigiit Partiiat)

Tunngavilersuut:

Siullermik Kattusseqatigiit Partiianni isumaqarpugut, inuit inuiaqatigiinni sulerusuttut ingerlatitseqataallutillu napatitseqataasut, akileraarutitigut pitsaanerusumik oqinnerusunillu atugassaqalernissaannut periarfissaqartinneqarnissaat pisariaqartoq.

Isumaqarpugut, sulinermi isertitat akileraaruserneqartarneri soorunami pissusissamisoortoq, aamma inuiaqatigiinni nammaqatigiinneq eqqarsaatigalugu.

Kisianni saniatigut isertitat toqqaannartumik akileraarutitigut tamakkiisumik ilanngaaffigineqartarneri isumaqarpugut naliliiffigineqaqqittariaqartut.

Tassami inuit sulerusussusermik pigisaqartut aamma ajunnginnerusumik pineqarnissaat sulinernullu suli pitsaanerusumik kajumissuseqarnissaat pissusissamisoortutut isigigatsigu.

Soorlu assersuutigalugu akileraarut tamakkiisoq 42 %-iusimappat, saniatigut isertitanit taanna tamaat akissarsianik ilanngaattigineqartartoq, nalunngilarput.

Inuk sulerusussusilik pisortaniit isumaqarpugut tapersersorneqarnerusariaqartoq.

Taamaattumik saniatigut isertitat eqqarsaatigalugit akileraarummik appasinnerusumik akilersuisalersinnaanermut tunngatillugu inatsisartut qanoq isumaqarnersut assut paaserusunnarpoq.

Soorlu assersuut, akileraarut 42%-iusimappat, saniatigut isertitat toqqaannartumik 42%-imik ilanngarnangit appasinnerusumilli akileraarusernalernissaa, soorlu 30%-imut appartinenqarsinnaanera inatsiasartut qanoq isumaqarfingivaat?

Eqqaamasariaqarparput aamma inuit taamatut sulerusussusillit, piffissamik ilaqtutami ilaginissaannut annaasaqaatigisarmassuk, saniatigullu akileraarummik tamakkiisumik akilersuisarlutik.

Taassuma naliliiffigineqaqqinnissaa Kattusseqatigiit Partiianni matumuuna ugartorparput, taamaattumillu akileraarnermut atugarissaarnernullu isumalioqatigiissitap aamma tamanna nalilersorumaaraa neriuutigaarput.

Utoqqaat siusinaartumillu sulisinnaajunnaarnersiuteqartut – saniatigut isertitaqarnerusinnaagaluartut uninngatinneqarput.

Assersuutigalugu, utoqqaat ilaat siumoortumik akileraarutitigut isertitaqalaarnissani nalunaarutigaa, kisianni suliluunniit saniatigut 1 kr-imilluunniit isertitaqanngitsoq, utoqqalinersiutai ilanngarterlugit aallartinneqareertarput.

Kattusseqatigiit Partiianniit isumaqarpugut akileraartarnikkut aaqqissuusseqqinnissaq innuttaasunut inuiqatigiinnullu iluaqutaanerusumik iluarsiivigineqarsinnaasoq, tassalu saniatigut isertitat akileraarusertarnerisa naliliiffigeqqinnerisigut iluarsineqarsinnaasut isumaqarpugut..

Tassami misissuinerpassuit maannamut ersersereerpaat, ukiuni tulliuuttuni inuit sulisinnaasut ikiligaluttuinnassasut. Taamaattumik inuit sulisinnaanerat sapinngisamik atorluarneqartariaqartoq Kattusseqatigiit Partiianniit isumaqarpugut.

Neriullunga Inatsisartunut oqallisissiatut saqqummiussarput, iluarsiiisutissatullu ujartukkavut inatsisartut paasinnilluarlutik isummersorfigiumaaraat.

Neriutigaara oqallisissiaq manna akileraartarnermut atugarissaarnermullu isumalioqatigiinnut aamma isummersorfissatut ilanngunneqarsinnaajumaartoq.

Oqallilluarnissarsi kissaatigalugu taamatut Kattusseqatigiit Partiianniit saqqummiussaqaarpugut.